

Date – 12/01/2026

Time - 18:30 -18:40Hrs

## AKASHVANI AIZAWL

### REGIONAL NEWS BULLETIN

#### HEADLINES ( EVENING )

1. Chief Minister Pu Lalduhoma'n ZPM sawrkarin sawrkar hmasate leiba avanga harsatna an tawhte chu sawrkar lola awm leh zel turten an tawh ve loh nan theihtawp an chhuah dawn a ti.
2. MPCC te chuan Kum 2026 atan Bhawan hawngin Aizawl Municipal Corporation Ward 13 a candidate tur an puang nghal.
3. Vawiin khan Gandhinagar-a Mahatma Mandir-ah Prime Minister Narendra Modia leh German Chancellor Friedrich Merz te ram aiawhin an inbia.
4. Vawiin khan Swami Vevekananda piancham pualin amah hriatrengna hun hman a ni .

<><><>

#### CM

Chief Minister Pu Lalduhoma'n ZPM sawrkarin sawrkar hmasate leiba avanga harsatna an tawhte chu sawrkar lola awm leh zel turten an tawh ve loh nan theihtawp an chhuah dawn a ti.

#### (Byte - Chief Minister)

Vawiina ZPM Chhung Inkhawma thu a sawinaah Pu Lalduhoma chuan ZPM sawrkarin kum 2 an sawrkar chhungin sawrkar hmasaten leiba an neih committed liability cheng nuai 6,311 an pek tlâk tawh thu leh pek hmabak cheng nuai 7646 ala awm thu a sawi a; ZPM sawrkar chuan an sawrkar loh hnua sawrkar turten leiba an chhawm ve loh nan hma an lak dawn thu a sawi.

Sawrkar hmasa ten committed liability hmangin leiba cheng engemawzat an hnutchhiah a; administrativa approval pawh awm lo, expenditure sanction leh work order pawh awm loa tawngkaa hna inpek, record a chuang lo a tam thu sawiin harsatna a tam phah hle tih a sawi.

Sawrkarna an siam hnua committed liability hnuaiah PWD Department leiba cheng nuai 1287 an pek tawh thu leh pek hmabak cheng nuai 583 ala awm thu Pu Lalduhoma chuan sawiin PHE Department hnuaiah leiba cheng nuai 4,842 an rulh tawh thu leh rulh hmabak cheng nuai 5,801 ala awm thu a sawi a, heng rulh hmabak la awmte hi kum 3 chhunga rulh zawh an tum thu a sawi.

Chief Minister chuan committed liability hnuaia Power & Electricity Department leiba cheng 182 an pek tawh lain pek hmabak cheng nuai 1262 ala awm

thu a sawi a; P&E Department leiba la awmte hi kum 2 chhunga rulh zawh an tum thu a sawi bawk.



## **POL PARTIES REOPENS OFFICE**

Kumthar 2026 atan vawiin khan political party te chuan an office an hawng tan a,

MNF Party chuan Hnam Run hawna hun hi vawiin khan hmangin, Party President Pu Zoramthanga Manganna hrang hrang kara kum 64 MNF hruai tawhtu Pathian chuan MNF chu kawng laklawhah a kalsan lovang a ti a. Pathian vuan a amah innghat tlat a pawimawh a ni a ti.

Pu Zoramthanga chuan, India ram leh Mizoramah pawh Party tam tak an ral tawh laiin MNF chu Mizoramah pawh party ruhrel lian ber a ni mek a ti a. 'Pathian leh kan ram tan' tia an din tlatna chu an felnaah Pathianin a ruat a ti.

Hnam Run hawna inkhawm ah hian Kumthar atana Pathian hruaina dila tawngtai rualna hun hman niin, Martar-te sunna hun hman a ni bawk a ni.

BJP Mizoram State Office , Mipui Rûn pawh vawiin han hawngin State President Dr K Beichhua, MLA chuan Party mite fuihna thu a sawi a, kum 2026-a BJP te kal dan tur ah fimkhur a pawimawh hle a, Pathian lam en a, Pathian ring chungin an kal zel anga, a kaihhruaina hnuaiyah lungual takin an kal zel dawn a ni," a ti.

Pu Beichhua chuan, Aizawl Municipal Corporation tih chakna tur atan BJP Party an pawimawh a ni tih an hriat a, Mizoram khawpui Aizawlah AMC kaltlanga mipui rawngbawlina hna thawk tur leh Mizoram hmel lanna Aizawl Khawpui ah hmasawna nasa zawk a lo thlen zel theih nan hma an lak nasat a pawimawh a ti bawk.



## **MPCC**

Mizoram Pradesh Congress Committee MPCC te chuan Kum 2026 atan Bhawan hawngin Aizawl Municipal Corporation Ward thenkhat a AMC candidate tur an puang nghal.

MPCC President Pu Lal Thanzara chuan thusawiin ZPM sawrkar chu mipui beisei an pha lo hle a, Term kal ta lamah MNF an sawrkar a mipui beisei an pha chuang lova, tun din hmunah mipui beiseina awmna chu Congress party hi an ni a ti a Chumi tihlawhtling tur chuan party miten theih tawp kan chhuah a ngai a, thingtlang lam a mipuite manganna ata khai chhuak turin an party chu an tanrual a pawimawh a ni a ti.

Kum 2025 chhung khan inthlanna hrang hrangah, a hma kum ai chuan hma an sawn hle tih sawiin theih tawp chhuah a an beihzel chuan hmalam an pan zel ang a ti.

MPCC President kalchhuak ta Pu Lal Thanhawla nupui Krismas hmaa a thih avanga an khawharna leh lungngaihna te hriatpui a hnem tu zawngte chungah lawm thu a sawi tih a sawi bawk.

Pu Lal Thanzara hian AMC Election 2026 lo awm tura Candidate puan thawh khatna atan mi 13 hming a puang a ni.

<><><>

## **MJA**

Mizoram Journalist's Association chuan vawiin khan kum 2026 kumthar inthlan tharna hun an buatsaih.

MJA buatsaih kumthar inthlan tharna ah hian MJA President Pu C. Lalrambuatsaiha chuan MJA member hmasawna tur hrang hrang sawiin Journalist te chungah mi beisei a san thin avangin an hna theuhah theihtawp chhuah theuh turin a chah a, chanchinbumite chu ruihhlo ah fihlim tura chahin an hmasawn zel theih nan in chhiar zau tur leh thawhhona kawngah inpawhna tha zawk a awm theih nan MJA hun buatsaih ngaih pawimawh zel a tul thu a sawi.

Vawiina hun hmanah hian MJA General Secretary Pu K. Zothanpara chuan kum 2025-a MJA hun hmanna hrang hrang report pe in an hmachhawp hrang hrang a tarlang a, Prominent journalist leh MJA Senior member hrang hrang thusawi ngaihthlak niin hun hlimawm tak hman a ni.

<><><>

## **PM VISWAKARMA SCHEME**

Sorkar laipui Ministry of MSME Aizawl chuan vawiin khan Siahaah PM Vishwakarma Scheme chungchang inhrilhzauna hun an buatsaih a

He scheme hnuai sumdawna tan dan te, internet kaltlanga sumdawna neih dan te leh tul hrang hrang te inzirtir a ni a, he bakah hian he scheme hnathawh dan leh kalphung hrang hrang te inzirtir a ni bawk a ni.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## **TOURISM MINISTER**

Tourism Minister Pu Lalnginglova Hmar chuan vawiin khan Vangchhe khuaah tourism project - Kawtchhuah Ropui leh PRASHAD (Pilgrimage Rejuvenation & Spiritual Augmentation Drive) hnuai project kal mek - Cultural & Heritage Centre hmuhma a tlawh.

He hunah hian Minister chuan in Tourism ah khawtlang leh mipui nen inkungkaihna tha a awm a tul thu sawiin project tantu chu sawrkar ni mahse, a thawk hah tur leh a hlawkna tel tur chu mipui an ni a ti a, Mizoram hmun hrang hrangah khualzin hip tura hmunhma leh event siamchawp a ngaih laiin Vangchhia chuan mikhual hiptu tha tak an neih sa avangin an vannei hle a, mikhual tam zawk an neih zel theih nan project kal mek tha taka lo enkawl tur leh mikhual lo chhawn tha zel turin a fuih a ni. Sawrkar tum danah chuan tourist lodge sak rup ai chuan homestay siam a tum zawk a, chung hmalaknaah chuan mipui lo tang zel turin a sawm bawk a ni.

Vangchhiaa project hi "Development of Basic Amenities under PRASHAD Scheme at Vangchhia" tih a ni a, pawisa duan zat hi cheng vaibelchhe 5.4732 a ni. A hmunah hian ruahtui khawl na te, solar streetlight leh khualzin mamawh leh lawm tur tam tak siam tum a ni. Kawtchhuah Ropui hi Archaeological Survey of India hnuai Protected Monument a ni a, saptawngin "Menhirs and Caves at Vangchhia" tih a ni.

<><><>

## **KHAWZAWL FISHERY**

Khawzawl District huamchhungah tun Sawrkar kum kal mekah hian Sawrkar kum liam ta 2024-2025 aiin Sangha thar chhuah engemawzatin a pun chhoh beisei a ni.

District Fisheries Development Office, Khawzawl atanga thu dawn danin, Sawrkar kum liam ta 2024-2025 khan Khawzawl District chhungah hian Sangha dil nei chungkaw 1160 awmin Sangha dil zawng zawng zau zawng hi Hectare 119.2 vel a zau a ni a, heta tang hian Sangha Metric Tonne 66.92 an thar chhuak a ni.

Khawzawl District-ah hian kum 2023 March ni 24 a District Fisheries Development Officer (DFDO) Office hawn a nih hnuah Sangha dil awmsa te a theih anga tihchangtlun a nih bakah Sangha dil te pawh laih belh zel a ni a. Sangha dil thar pawh tun dinhmunah 300 vel lai siam belh ni tawhin tunah hian hmalakna kal mek engemawzat ala awm bawk a. Hetianga hmalakna kalpui chhoh zel a nih avang hian tun Sawrkar kum kal mekah hian Sangha dil thar chhuah pawh engemawzatin a pun chhoh an beisei a ni.

<><><>

## **LUNGLEI**

Aizawl leh Lunglei inkar kawngpui ATL Road siam mekah an kawng siamna khawl Pukpui, Lunglei daia an dah chu mi tu tih hriatloh in lo suasam in, khawl thenkhat electric wiring lo tan chhia in an ru bo a.

Heng bakah hian diesel litre 100 vel bo telin Lunglei-PS ah FIR thehluh a ni a. Thubuai bawhzui hian vawiin khan he pawikhawihnaa inhnamnawih rinhlelh T.Lalrinmawia (39) Pukpui, Lunglei a khawsa ni a inehhal chu man a ni. Thu zawhfiah anih hnuah pawikhawih naah hian a inhnamnawih ngei a ni tih police hma ah a sawi a, thu zawh fiah chhunzawm niin, thil tul angte tih chhunzawm zel a ni .

<><><>

## PM & GERMAN CH

Vawiin khan Gandhinagar-a Mahatma Mandir-ah Prime Minister Narendra Modia leh German Chancellor Friedrich Merz te ram aiawhin an inbia. Tun tum hi German Chancellor Merz hian India a lo tlawh vawi khatna a ni a. Hruaitu pahnihte hian sector hrang hranga India leh Germany thawhdunnate an sawidun a. Kumina kum 25 tling tur India-Germany Strategic Partnership chungchang pawh an thlirlet a ni.

Vawiina inbiaknaah hian sumdawna lamte, sum peipunna investment leh tunlai thiamna changkang high-end technology lamte sawi a ni a. Hei bakah hian ram venhimna lamte, boruak ti chhe tlem hmasawna leh science leh zirbingna lam pawh sawilan a ni a. Khawvel thil thleng pawimawh tak takte an sawilang bawk a ni.

Vawiin vek khan Pirme Minister Modia leh German Chancellor Merz te hian Sabarmati Ashram an tlawh bawk a. Hei bakah hian Ahmedabad-a Kite Festival ah an tel dawn a ni.



## SWAMI VIVEKANANDA

Vawiin khan Swami Vevekananda piancham pualin amah hriatrengna hun hman a ni .

President Droupadi Murmu, Vice President C P Radhakrishnan leh Prime Minister Narendra Modi leh hruaitu dangten Swami Vivekananda hriatreng nan zahna an hlan a. President Murmu-i chuan Swami Vivekananda chu hmathlir neitha leh thlarau lama hruaitu ropui chhungril lam chakna chawi larut leh mihringte tana rawngbawlsak hlutzia thehlartu a ni a ti. Vice President pawhin Swami Vivekananda chu a nun leh zirtirna ten chhungril chakna, mahni inthununna leh midangte rawngbawlsaknain nun awmze nei a siam tih a lantir a ti a. PM Modia pawhin Swami Vivekananda chu ramchhung thalaite thinlung fuih phurtu a nih thu a sawi bawk a ni. nion Home Minister Amit Shah leh Information and Broadcasting Minister Ashwini Vaishnaw te pawhin Swami Vivekananda hriatrengna hun hi an hmang bawk a ni.

Swami Vivekananda piancham pual hian National Youth Day hman a ni bawk.

